

REGIONAL NEWS

HEADLINES:-

1. Assembly budget session naktuka chhunzawm turah LESDE minister Pu Lalnghinglova Hmar-in bill thar 2 a putluh leh CM Pu Lalduhoma'n dan dinglai siamthatna tur a putluh sawi ho a ni dawn.
2. Higher & technical education minister Dr. Vanlalhlana hova thutkhawmna-ah Mizoramin state university a neih ngei a ngaih tawh thu tarlan a ni.
3. Union Home Minister Amit Shah-a'n ruihhlo awm lohna ram din turin ruihhlo zuar leh tawlh thinte zawn chhuah hna, ngawrh leh zualin thawh a ni dawn tih a sawi.
4. Angola ramah tuihri leng vangin mi 200 chuang an thi tawh.

<><><>

ASSEMBLY SESSION

Assembly budget session naktuka chhunzawm turah LESDE minister Pu Lalnghinglova Hmar-in bill thar hlak 2 a putluh leh chief minister Pu Lalduhoma'n dan dinglai siamthatna tur a putluh sawi ho a ni dawn.

Assembly inkhawm kal mek chu Finance Commission 16-na lo zin avanga chawlhkar khat chawlh a nih hnu-ah naktuk hian chhunzawm leh a ni dawn a. Naktukah hian chief minister Pu Lalduhoma, finance changtu ni bawk, chuan "The Mizoram Goods and Services Tax (First Amendment) Bill, 2025" dan siamthatna tur chu a pulut ang a. Labour, Employment, Skill Development & Entrepreneurship (LESDE) minister Pu Lalnghinglova'n "The Mizoram Youth Commission Bill, 2025 leh "The Mizoram Private Placement Agencies (Regulation) Bill, 2025" chu pulutin heng dan thar siam tura duan 2 leh dan ding lai pakhat siamthatna tur bill-te hi sawi hova naktukah vek pawm tum a ni ang.

Assembly secretariat atanga thu dawn danin dan siam tur leh dan dinglai siamthat tur lut hi a vaiin 9 a tling tawh a. Sorkar dan siam tur chhawpchhuahte hi naktuk leh March ni 6 (Ningani) te khian putluh a sawiho a ni dawn niin business advisory committee (BAC)-in assembly inkhawm hun hman dan tur a duan lawk atang chuan a lang a ni.

March ni 20 thleng awh tur assembly inkhawmah hian tun thlengin House chhunga chhan chi zawhna 918 a lut tawh a, ziaka chhan chi zawhna 105 a lut tawh bawk a. House dawhkana dah tur lehkhaw pawimawh 8 a lut tawh a, official resolution 1 a a lut tawh bawk.

<><><>

WORKERS

PMEGP loan lak hmanga hlawhtling chho mek Lunglei khawpui a din LR Industry-ah zing vartian atanga zan dar 6:00 vel thlengin Mizo tlangval kum 18-45 inkar mi 11 vel te'n rim takin hna an thawk thin a, a hlawh tam pawl chuan thla khatah Rs 40,000 te an hlawh.

LR Industry hi thir leh aluminium hmang a hnathawhna a ni a, a neitu pa Bazar veng Lunglei a cheng Pu Ramdinzauva chuan kum 2018-ah Steel fabrication hi tan a nih thu sawiin tun dinhmunah chuan Lunglei khawpui chhung amite insakna tur, tukverh leh Frame chi hrang hrang thawh tur

an nei reng tih sawiin khaw pawn lamah pawh hnathawh tura chah chu awm bawh thin mahse an thawh hman meuh lo niin a sawi. Mizo tlangval a tam thei ang berin welding hi thiam se a duh tih sawiin mi engemawzat a chherchhuah ve tawh thu leh a hnen atang indang a, mahni a dawh hawng leh mi hnuaia welder tha tak tak te pawh an lo awm ve tawh tih a sawi a, mi tumruh leh taima tan chuan welding hi thil harsa lo tak tur a ni a ti.

Hnuchham enkawlina, Bethel Centre a an enkawl thin, naupang/rawlthar mi 4 chu tunah hian anmahni chungkaw member ang chiaah a lalutin hnathawhna-ah hian a chhawr a, mi pakhat langin a rawn kal thin tih a sawi a. Aluminium, leh kahphathir hmanga hnathawh chu an thiam tawh khawp niin a sawi. Mizo thalaite a thlawn a welding zirtir a tum tih a sawi a, hnamdang an tluk lohna bik a awm lovang a ti a ni.

<><><>

STATE UNIVERSITY

Higher & technical education minister Dr. Vanlalhlana hova MLA thenkhat leh department hotute thutkhawmna-ah Mizoramin state university a neih ngei a ngaih tawh thu tarlan a ni.

Minister hova thutkhawmna-ah hian National Education Policy (NEP) 2020-in a phut angin Mizoram University ang central university-te chu 2035 atangin research-intensive university a nih a tul tawh dawn a. Central university-ten degree an pek tawh dawn loh avangin state university-te'n degree an pek a ngai tawh dawn a, chumi tur chuan Mizoramin State University a neih ngei a ngaih tawh thu sawi lan a ni a. State university nei tur hian sum tam tak sen belh a tul dawn a. Mizoram Sawrkar sum dinhmun a that tawh loh avangin State dangte tihdan pawh a hmuna tlawha zir chian a ni a. State University hi campus zau tak nei a din chu duhthusam a nih rualin, Mizoram Sawrkar sum dinhmun thlirin chu chu kalpui theih dawn loha ngaih a ni a. Chuvang chuan, State thenkhatte'n State University an kalpui dan angin college neih sa te hmang tangkaiin Mizoram state university din chu 'clustered university' kal phunga din turin Mizoram Sawrkar chuan hma a la ta a. NEP 2020 duh dan angin State University chu multidisciplinary-a kal a ngaih avangin college eng emaw zah chu sawikhawm (cluster) tum niin, resource neih sa inhman tawm theih chu inhman tawm tura ruahmanna siam a ni.

Hemi mil hian Mizoram State University Bill, 2025 chu Assembly Session kal lai mekah hian theh luh a nih thu inhrilh fiah a ni a. Champhai leh Lunglei district a tlawmngai pawl intelkhawmte'n an district a state university din tura an dilna chungchang pawh sawiho tel a ni a. District pahnihin an dilna hi tih awm tak ni a ngaiin a hrethiam hle a. Chutih laiin, Mizoram sorkarin state university din tura hma a lo lak tawh dan leh din ngei ngei a ngaih dante inhrilhfiah a ni a. Khawi district zawkah nge din a nih ang tih chu sorkar thuchhuah chuan a tarlang lo.

Sawihona-ah hian health minister leh Lunglei East bialtu MLA Pi Lalrinpuui te, Lunglei North bialtu Pu V. Malsawmtluanga, Lunglei South bialtu Pu Lalramliana Papuaia, leh Champhai North bialtu Pu Ginzalala te bakah Higher & Technical Education Department officer-te an tel a ni.

KTP

Zirtawpni zan atanga tan, KTP Rorel Inkhawm vawi 11-na chu zanin hian a tiak ang.

KTP rorel inkhawm hi Chawnpui Kohhranin a thleng a. Zirtawpni zan kha palai lawmna inkhawm atan hun hmangin General Secretary report, Finance report leh Bial report khaikhawmna ngaihthlak a ni a, KTP Kumpuan hawn leh hlanna hun hman a ni bawk. Nimin (Inrinnei) nileng kha Rorel inkhawm a ni a. Vawiin chawhma, chawhnu leh zanah te vantlang Pathian biak inkhawm a awm a, zanain rorel inkhawm hi a tiak ang.

KTP Rorel inkhawm chuan kum 2026-27 Kumpuan Thupui atan 'Chhungril Takna' an thlang a. An thurel zingah bial tinah youth recreation centre (YRC) pual budget siam leh tur tihte, Hospital Charity Fund Pual, YRC Pual leh Chhawmdawlina pualin inkhawm thawhlawm lak tur tihte, ruihhlo do chhunzawm bakah khawlai rawngbawlina kalpui zui tur tihte a ni a. KTP Rorel Inkhawm vawi 12-na chu kum 2017 khian Kulikawn Kohhran-in a thleng dawn a ni.

KTP-ah hian bial 223, branch 907 leh a vaiin member nuai 1, sing 7, sang 7 leh 548 an awm mek a, mipa nuai khat 1, sang 7 leh 535 leh hmeichhia 70,013 an ni. Member ngah ber bial KTP chu Champhai bial a ni a, member 2,599 an awm a, member nei tlem ber Buarpui bial chuan 33 chauh an nei a ni.

<><><>

ECM

Evangelical Church of Maraland (ECM) Assembly vawi 102-na ECM Siahatla Kohhran-a kar kalta Nilaini zan atanga tan chu zanin hian a tiak ang.

Nithum chung rorel inkhawm kalpui a ni a, vawiin khan pastor puitlingah mi pahnih nemngheh an ni bawk. Assembly rorelna leh Inkhawm hi Rev. K. Vabeinocho Moderator in a kaih hruai a, rorêl thei members 611 ațangin Palai 504 rorelna-ah an tel a ni. Kum 2024-2025 inkara Upa 21 thi sunna hun hman a nih bakah Assembly Executive Committee in Kum 2025-2027 nomination member atâna a ruat mi 10 te pawmpui a ni. Thurel tura chhawpchhuah langsar zual zingah pastor bial thar pathum siam rawtna pawm a ni a. Mission Ramthim Bâwm ațanga sum tlingkhawm cheng nuai 243, sing6 leh sang 5 chuang chu, ramthar hmun hrang hrang Mission Field lamah Biakin sakna tur te, Ram lei tur te, thawktute chenna in sak tur te, Mission hmasâwnna hman dân tur ruahmanna chu pawm a ni bawk.

Christian Hindi Ministry ațanga thu lut, tirhkoh lâk tur te, CHM tana Hlabu hran siam rawtna te leh 2025-2026 CHM Budget atân cheng nuai 23 leh sing 1 pawm a ni a. Social Mission Department ațanga thu lut, Agape Home Building sak belh tur te, Agape Home atana Generator lei tur te, Skill Development kalpui tur te, Kohhran members zînga fa panga (5) aia tam nei te hnênah lâwmman pêk nise tih rawtna te chu pawm a ni bawk. Kum 2025-2026 chhunga ECM budget pumpui ruahman vaibelchhe 20 chuang chu pawm a ni a, KPP, KNP, KTP leh KHP budget leh Assembly pawmpui tura an thlen Agenda te pawm a ni bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

UNION HM VOWS

Union Home Minister Amit Shah-a'n ruihhlo awm lohna India din turin ruihhlo zuar leh tawlh thinte zawn chhuah hna, ngawrh leh zualin thawh a ni ang, a ti.

He thu hi social media-ah tarlangin ruihhlo tawlh ru thinte zawn chhuah hna, uluk leh fimkhur taka thawh anih avangin ramchhung hmun hrang hrangah court-in ruihhlo tawlhru thin mi 29 thiamloh a chantir tawh, a ti a, Narendra Modi-a sorkar chuan sum tawh tarha hmanga thalaite hruai sualtu ruihhlo tawlh thinte chu a dim dawnlo tih a tarlang bawh.

<><><>

ANGOLA CHOLERA OUTBREAK

Angola ramah tuihri leng vangin mi 201 an thi tawh a. Angola Health Ministry sawi danin kumin January thla tir lam atang khan tuihri vei, mi 5600 vel an awm tawh a ni.

He hri hi Angola ram province 21-a 13-ah a leng a, Luanda khawpui atanga leng tan a ni.

World Health Organisation sawi danin, tuihri hi natna hrik chi khat, Vibrio cholera-in a thlen a ni a, hri veite chu nasa takin an kua a thalo a ni.

<><><>

RAMAZAN BEGINS

Mosolman-te chaw nghei thla, Ramzan chu vawiin atang khan ram pumah Mosolman-ten an hmang tan a, he thla serh pual hian nizan khan Mosolman-te, an biak in-ah an tawngtai a ni. Ramzan hi Mosolman calendar-ah thla 9-na niin thla serh tawp dawnah Id-ul-Fitr an hmang thin a ni.

Khawvel hmun dangah te pawh Ramzan hi Mosolman-ten urhsun takin an hmang a, Gulf ramah te chuan nimin atang khan an hmang tan a ni. Israel chuan Ramzan leh Juda-te kut pawimawh, Kahlen Kut hman anih dawn avangin hemi hun chung hian Gaza-ah inkahhai neih a remti a ti.

<><><>